

## DANIEL

### JEPTA 1

- [Da 1.1] Ilo iiō eo kein ka jilu an Jehoiakim kiñ in Juda irooj, Nebukadnezar, kiñ in Babilon ear itok im nitbwile Jerusalem.
- [2] Im Irooj ear lelōk Jehoiakim, kiñ in Juda, ɲa ilo pein kab jet ian kein jermal ko an mōn Anij. Im ear bōkļōk er ñan āne in Sainar ñan mōn anij eo an, im ear likūt kein jermal ko ilo mōn m̄weiuk eo an anij eo an.
- [3] Innām kiñ eo ear ba ñan Ashpenaz, irooj in ri kabōjrak ro an, bwe en bōktok jet jān ro nejin Israel im jān ro ineen kiñ im jān nukwōn irooj ro,
- [4] likao ro me ejjeļōk jorrān ilo ānbwinneir, im re wulio, im rekapeel ilo aolep kain mālōtlōt, im eļap aer jeļāļōkjen, im rej meļeļe elōñ men, im ro ewor aer marōñ in jutak ilo mōn kiñ eo, im bwe ren katakin er bok ko im kajin ro ri Kaldia.
- [5] Im kiñ eo ear jiroñ bwe ren lelōk ñan er jān raan ñan raan jān mōñā eo kijen kiñ eo im jān wain eo limen, im bwe ren katakin er iumwin jilu iiō. Im ilo jemļōken renaaj jutak iᵐaan kiñ eo.
- [6] Im jān ibwiljeir ear wor Daniel, Hananaia, Mishael, im Azaraia jān ro nejin Juda.
- [7] Innām irooj in ri kabōjrak ro ear liļōk āt ko rekāāl ñan er. Ear ɲaetan Daniel Belteshazar im Hananaia Shadrak, im Mishael Meshak, im Azaraia Abednego.
- [8] Ak Daniel ear pepe ilo būruen bwe eban kattoo e kōn mōñā ko jān kiñ eo im kōn wain eo limen. Innām ear kajjitōk ippān irooj in ri jermal ro bwe en jab make kattoo e.
- [9] Im Anij ekar leļōk ñan Daniel jouj im tūriamō ilo mejen irooj in ri jermal ro.
- [10] Innām irooj in ro ri kabōjrak ro ear ba ñan Daniel, “Imijak irooj eo aō, kiñ eo, eo ear jiroñ kōn mōñā ko kijemi im dān eo limemi. Im etke en lo mejemi renana jān likao ro jet dettan wōt kom? Innām komnaaj kōmman bwe kiñ eo en jeke bōra.
- [11] Innām Daniel ear ba ñan ri kōmne eo, eo irooj in ri kabōjrak ro ear likūt ion Daniel, Hananaia, Mishael, im Azaraia,
- [12] “Jouj im mālļejoñ ro ri karijeram iumwin joñoul raan. Im ren letok ñan kōm kanināne bwe kōmin mōñā im aebōj bwe kōmin daak.
- [13] Innām kwōn lale mejem kab mejen likao ro rej mōñā jān kijen kiñ eo; im kwōn kōmman ippān ro ri karijeram ekkar ñan am lale.”
- [14] Innām ear eoroñ er ilo men in, im ear mālļejoñ er iumwin joñoul raan.
- [15] Im ke ejemļōk raan ko joñoul, ear emmanļōk mejeir im kileļōk ānbwinneir jān aolep likao ro raar mōñā jān kijen kiñ eo.
- [16] Innām ri kōmne eo ear bōkļōk kijeir im barāinwōt limeir wain, im ear lelōk ñan er kanināne.
- [17] Im likao rein emān, Anij ear liļōk ñan er jeļāļōkjen im kapeel ilo aolep kain katak im mālōtlōt, im Daniel ear meļeļe aolep kain vision im tōᵅak ko.
- [18] Im ijemļōken raan ko me kiñ eo ear kōnono kake bwe ren bōktok er, irooj in ri kabōjrak ro ear bōktok er iᵐaan Nebukadnezar.
- [19] Im kiñ eo ear kōnono ippaer, im jān aolepeir raar jab lo jabdewōt āinwōt Daniel, Hananaia, Mishael, im Azaraia; im raar jutak iᵐaan kiñ eo.
- [20] Im ilo aolep kain meļeļe im jeļāļōkjen eo kiñ eo ear kajjitōk ippaer kaki, ear lo er joñoul alen emman jān aolep ro ri marmir im ri anijnij ro raar ilo aolepen aelōñ eo an.

[21] Im Daniel ear pād mae iio eo kein ka juon an kiñ Sairōs.

## JEPTA 2

- [Da 2.1] Ilo iio eo kein ka ruo an Nebukadnezar kiñ, Nebukadnezar ear ettōṅak. Im ear inepata ilo an, im ear jab maroñ kiki.
- [2] Innām kiñ eo ear ba bwe ren kūrtoḱ ro ri marmir im ri anijnij im ri kōkōpal im ro ri Kaldia bwe ren kwaḷoḱ ñan kiñ eo tōṅak ko an. Im raar deḷoñ im jutak iṃaan kiñ eo.
- [3] Innām kiñ eo ear ba ñan er, “Iar ettōṅake juon tōṅak; im aō ej inepata bwe in meḷeḷe tōṅak eo.
- [4] Im ro ri Kaldia raar kōnono ñan kiñ eo im ba, “O Kiñ, kwōn mour ñan indeeo! Kwōn kwaḷoḱtoḱ tōṅak eo ñan ro ri karijeram, im kōmnaaj kwaḷoḱ meḷeḷein.”
- [5] Innām kiñ eo ear uwaak im ba ñan ro ri Kaldia, “Emōj aō pepe kōn men in. Eḷaññe koṃij jab kwaḷoḱ tōṅak eo im meḷeḷein ñan eō, innām naaj bukwe koṃ im kōṃṃan ṃoko iṃwemi jikin kabojak.
- [6] Ak eḷaññe koṃij kwaḷoḱ tōṅak eo im meḷeḷein, koṃ naaj bōk jān eō men in lewōj im oṃeami im utiej eḷap. Kōn men in, koṃwin kwaḷoḱ ñan eō tōṅak eo im meḷeḷein.”
- [7] Raar uwaak iien eo kein ka ruo im ba, “Kiñ ne en kwaḷoḱ ñan ri karijeran tōṅak eo, im kōmnaaj kwaḷoḱ meḷeḷein.”
- [8] Kiñ eo ear uwaak im ba, “Ijeḷā bwe ilo ṃool koṃij kapok iien bwe koṃij lo bwe naan in jān eō epen.
- [9] Bwe eḷaññe koṃij jab kwaḷoḱ ñan eō tōṅak eo, ewor juon wōt kien ñan koṃ. Koṃ ar pepe ippān doon bwe koṃwin kwaḷoḱ naan ko re riab im bōd iṃaō mae iien e oktak men eo. Kōn men in koṃwin kwaḷoḱ ñan eō tōṅak eo, im inaaj jeḷā bwe koṃ maroñ in kwaḷoḱ meḷeḷein ñan eō.”
- [10] Innām ro ri Kaldia raar uwaak kiñ eo im ba, “Ejjeḷoḱ armej ion laḷ e maroñ kwaḷoḱ men in ñan kiñ eo; im ejañin wor juon kiñ eḷap im e utiej eo ear kajjitōḱ men rōt in ippān jabdewōt ri marmir, ri anijnij, ak ri kōkōpal.
- [11] Kab men in kiñ eo ear kajjitōḱ kake e pen, im ejjeḷoḱ bar juon e maroñ kwaḷoḱe ñan kiñ ne ijelloḱin anij ro, im jikin jokwe eo aer ejab ippān kanniōḱ.”
- [12] Kōn men in, kiñ eo ear paḷ im kanooj illu, im ear ba bwe ren ṃan aolep ri mālōtlōt ro ilo Babilon.
- [13] Innām kien eo ear iḷoḱ bwe ren ṃan ri mālōtlōt ro, im raar pukōt Daniel im ro ṃōttan bwe ren ṃan er.
- [14] Innām Daniel ear uwaak kōn jeḷāḷoḱjeṃ im mālōtlōt ñan Ariok, kapen in jaran ebaar an kiñ eo, eo ear diwōjḷoḱ bwe en ṃan ri mālōtlōt ro an Babilōn.
- [15] Im ear uwaak ñan Ariok, irooj eo an kiñ eo, “Etke enañin pen kien eo jān kiñ eo?” Innām Ariok ear kwaḷoḱ men eo ñan Daniel.
- [16] Im Daniel ear deḷoñ im kajjitōḱ ippān kiñ eo bwe en leḷoḱ jidik iien ñan e bwe en kwaḷoḱ meḷeḷein ñan kiñ eo.
- [17] Innām Daniel ear etal ñan ṃweo iṃōn im kwaḷoḱ men eo ñan Hananaia, Mishael, im Azaraia,
- [18] bwe ren kajjitōḱ tūriamō jān Anij in lañ kōn men in ettino in bwe Daniel im ro ṃōttan ren jab jako ippān ri mālōtlōt ro jet an Babilon.

- [19] Innām ar kwaḷok men in ettino in ñan Daniel ilo juon vision ilo boñ. Innām Daniel ear nōbar Anij in lañ.
- [20] Daniel ear uwaak im ba, “Eṃōñōñō etan Anij jān indeeo ñan indeeo, bwe mālōtlōt im kajoor rej An.
- [21] E eo Ej ukōt iien ko im iiō ko, im Ej joḷok kiñ ro im kajutak kiñ ro; Ej lelōk mālōtlōt ñan ro remālōtlōt im jeḷaḷokjeñ ñan ro rejelā mejeje ko.
- [22] E eo Ej kwaḷok men ko re ṃwilal im re ttino; E jelā ta eo ej ilo marok, im meram ej jokwe Ippān.
- [23] Ij kamṃoolol im nōbar Eok, O Anij an ro jimṃa, bwe Kwar letok ñan eō mālōtlōt im maroñ, im kiiō Kwar kwaḷok ñan eō men eo kōm ar kajjitōk Ippam, bwe Kwar kwaḷok ñan kōm men eo an kiñ eo.”
- [24] Kōn men in Daniel ear etal ñan ippān Ariok, eo kiñ eo ear kāālōte bwe en ṃan ro ri mālōtlōt an Babilon, im ear deḷoñ im kōnono ippān āindein: “Kwōn jab ṃan ro ri mālōtlōt an Babilon. Kwōn āñinḷok eō iṃaan kiñ eo, im inaaḷ kwaḷok mejejein ñan kiñ eo.”
- [25] Innām Ariok ear ṃōkaj in āñinḷok Daniel ñan iṃaan kiñ eo, im ear ba ñan e, “Iar lo juon eṃṃaan jān ro ri jepokwe an Juda eo enaaḷ kwaḷok mejejein ñan kiñ eo.”
- [26] Kiñ eo ear uwaak im ba ñan Daniel, eo etan eo juon Belteshazar, “Ko maroñ kwaḷok ñan eō tōṃak eo iar loe im mejejein ke?”
- [27] Daniel ear uwaak iṃaan kiñ eo im ba, “Ejjeḷok ri mālōtlōt ak ri anijnij ak ri marmir ak ri bubu emaroñ kamejejeik ñan kiñ eo men in e ttino eo kiñ eo ear kajjitōk kake.
- [28] Bōtab, ewor juon Anij i lañ eo ej kwaḷok men ko re ttino, im Ear kwaḷok ñan Kiñ Nebukadnezar ta eo enaaḷ waḷok ilo raan ko rej itok. Tōṃak eo aṃ im vision ko ilo ḷōṃṃak ko aṃ ke kwar ion kiniōṃ raar āindein:
- [29] kōn kwe, O kiñ, ke kwar ion kiniōṃ ḷōṃṃak ko aṃ raar oktak ñan men ko renaaj waḷok tokālik. Im Eo ej kaalikkar men ko re ttino ear kwaḷok ñan eok ta eo enaaḷ waḷok.
- [30] Im kōn ña, ar jab kwaḷok ettino in ñan eō kōnke eḷap aō mālōtlōt jān aolep ro jet rej mour, ak ej bwe en alikkar mejeje eo ñan kiñ eo im bwe kwōn jelā ḷōṃṃak ko an būruōṃ.
- [31] Kwe, O Kiñ, kwar reiḷok, im lo, ear wor juon ekjab eḷap, im ekjab in eo ear ḷap im kanooj aiboojoj ear jutak iṃaam, im wāween ear kabwilōñlōñ.
- [32] Bōran ekjab in ear jān gold eṃṃan, ubōn im pein jān silver, loḷjien im ipin jān jinibōrōrō,
- [33] jurōn neen jān māāl, im neen jimattan māāl im jimattan kle.
- [34] Kwar lale ṃae iien eṃōj jeke juon dekā ak jab kōn pā, im ear deñōte ekjab eo i neen eo ear kōṃṃan jān māāl im kle, im ear kaprakōlkōle er.
- [35] Innām eṃōj kaprakōlkōle māāl, kle, jinibōrōrō, silver im gold ilo juon wōt iien, im raar āinwōt kilin wit ion jikin deñdeñ wit ilo iien māāñāñ. Im kōto eo ear bōkḷoki bwe aolepeir ren kanooj jako. Im dekā eo ear deñōte ekjab eo ear erom juon toḷ eḷap, im ear kobrak laḷ.
- [36] Eñin tōṃak eo, im kōmnaaj kwaḷok mejejein ñan kiñ eo.
- [37] Kwe, O Kiñ, kwōj kiñ an kiñ ran, bwe Anij in lañ ear lewōj juon aelōñ, maroñ, kajoor, im aiboojoj.
- [38] Im ro nejin armej ilo jabdewōt jikin rej jokwe ie, kab men in mour an meḷaaj im bao in mejatoto, Ear liḷoki ṃa ilo peōṃ, im Ear kairooj eok ioer otemjej. Kwe bar eo jān gold.
- [39] Im bar juon aelōñ ettā jān aṃ enaaḷ jutak ālikōṃ, innām bar juon aelōñ, kein kajilu ālikin, eo ej jinibōrōrō eo, enaaḷ irooj ion aolepen laḷ.

- [40] Im aelōñ eo kein ka emān enaaj kajoor āinwōt mǎāl, bwe mǎāl ej rupe im kaprakōlkōle aolep men; im āinwōt mǎāl ej iṃaajaj, enaaj rupe im iṃaajaj aolep men.
- [41] Im bwe kwar lo neen im addi in neen jimattan jǎn kle an ri potter im jimattan jǎn mǎāl, aelōñ eo enaaj jepel; ak enaaj wor jidik pen jǎn mǎāl ilo e, āinwōt ke kwar lo mǎāl eo ear kǎre ippǎn kle.
- [42] Im āinwōt addi in neen raar jimattan mǎāl im jimattan kle, āindein ṃōttan aelōñ eo enaaj kajoor im ṃōttan enaaj ekkōṃ.
- [43] Im āinwōt kwar lo mǎāl kǎre ippǎn kle an ri potter, ineen armej renaaj kǎre ippǎn doon, ak reban eddǎp ippǎn doon, āinwōt mǎāl ejab kǎre ippǎn kle.
- [44] Im ilo raan ko an kiñ raṃ, Anij in lañ enaaj kajutak juon aelōñ eo eban jako indeeo, im aelōñ in reban leḷok ñan armej ro jet. Enaaj kaprakōlkōl im kōkkure aolep aelōñ kein, im enaaj jutak ñan indeeo.
- [45] Im ke kwar lo bwe eṃōj jeke dekǎ eo jǎn juon toḷ im bwe ear kaprakōlkōli mǎāl im jiniḃōrōrō im kle im silver im gold, Anij eḷap ear kajelǎik kiñ ne ta eo enaaj waḷok tokǎlik, im tōṃak in eṃool im meḷeḷe eo jimwe.”
- [46] Innām Kiñ Nebukadnezar ear buñpedo iṃaan Daniel im koutiej e, im ear jiroñ bwe ren leḷok jurtak im kaijurjur ñan e.
- [47] Kiñ eo ear uwaak Daniel im ba, “Ilo ṃool, Anij eo aṃ ej Anij in anij raṃ im Irooj in kiñ ro im Ej kwaḷok men ko re ttino, bwe kwar maroñ in kwaḷok ettino in.”
- [48] Innām kiñ eo ear koutiej Daniel im liḷok ñan e elōñ men in leḷok reṃṃan, im ear kōṃṃan e irooj ion aolepen bukwōn in Babilon im ri tōl eḷap ion aolep ri mǎlōtlōt ro in Babilon.
- [49] Im Daniel ear kajjitōk ippǎn kiñ eo, im ear likūt Shadrak, Meshak, im Abednego ion jermal in bukwōn in Babilon, im Daniel ear pǎd ilo kōjam an kiñ eo.

### JEPTA 3

- [Da 3.1] Kiñ Nebukadnezar ear kōṃṃan juon ekjab jǎn gold. Ear jiljinoñoul kubit utiej in jiljino kubit depakpaken. Ear kajutak e ilo āne eo piken wōt juon an Dura eo ej ilo bukwōn an Babilon.
- [2] Innām Kiñ Nebukadnezar ear jilkinḷok bwe ren kokweiḷoktok satrap ro, prefect ro, irooj ro, ri kapilōk ro, ri kōmñe ro, ri ekajet ro, ri kien ro, im aolep ri utiej ro an bukwōn ko bwe ren itok ñan iien ajelōk ekjab eo Kiñ Nebukadnezar ear kajutake.
- [3] Innām eṃōj an satrap ro, prefect ro, irooj ro, ri kapilōk ro, ri kōmñe ro, ri ekajet ro, ri kien ro, im aolep ri utiej ro an bukwōn ko kweiḷoktok ñan iien ajelōk ekjab eo Kiñ Nebukadnezar ear kajutake. Im raar jutak iṃaan ekjab eo Nebukadnezar ear kajutake.
- [4] Im juon ri kwaḷok ear laṃōj kōn eḷap ainikien, “Eṃōj jiroñ koṃ, armej ro, aelōñ ko, im armej in aolep kajin;
- [5] ñe komij roñjake ainikien jilel, flut, lair, trigon, harp, paip, im aolep kain kein kajañjañ, koṃnaaj buñpedo im kabuñ ñan ekjab gold eo Kiñ Nebukadnezar ear kajutake.
- [6] Ak jabdewōt eo ejab buñpedo im kabuñ, ilo iien eo renaaj joḷok e ioḷapen juon upaaj in kijeek ebwil.”
- [7] Kōn men in, ke aolep armej raar roñ ainikien jilel, flut, lair, trigon, harp, im aolep kain kein kajañjañ, aolep armej im ro ri aelōñ ko im armej in aolep kajin raar buñpedo im kabuñ ñan ekjab gold eo Kiñ Nebukadnezar ekar kajutake.

- [8] Ilo iien eo jet ri Kaldia raar kepaak im kinaakļok ri Ju ro.
- [9] Raar kōnono im ba ñan Kiñ Nebukadnezar, “O Kiñ, kwōn mour indeeo.
- [10] Kwe, O kiñ, kwar kōmman juon kien bwe aolep armej ñe rej roñ ainikien jilel, flut, lair, trigon, harp, paip, im aolep kain kein kajañjañ, ren buñpedo im kabuñ ñan ekjab gold eo.
- [11] Ak jabdewōt eo ejab buñpedo im kabuñ, renaaj joļok e ioļapen juon upaaj in kijeek ebwil.
- [12] Ewor jet ri Ju ro kwar likūt er ion jermal in bukwōn in Babilon: Shadrak, Meshak, im Abednego. Armej rein raar kajekdoon eok, O kiñ. Raar jab korijer ñan anij ro am, im raar jab kabuñ ñan ekjab gold eo kwar kajutake.”
- [13] Innām Nebukadnezar ilo an illu im paļ ear ba bwe ren ãñintok Shadrak, Meshak, im Abednego. Innām raar ãñintok likao rein imaan kiñ eo.
- [14] Nebukadnezar ear kōnono im ba ñan er, “Mool ke, Shadrak, Meshak, im Abednego, bwe komij jab korijer ñan anij ro aō ak kabuñ ñan ekjab gold eo iar kajutake?
- [15] Kiiō, eļañne komij pojak ilo iien eo komij roñjake ainikien jilel, flut, lair, trigon, harp, paip, im aolep kain kein kajañjañ bwe komwin buñpedo im kabuñ ñan ekjab eo iar kōmmane, emman. Ak eļañne komij jab kabuñ, ilo iien eo wōt renaaj joļok kom ioļapen juon upaaj in kijeek ebwil. Im wōn anij eo emaroñ loṃoṃoremi jān peiō?”
- [16] Shadrak, Meshak, im Abednego raar uwaak im ba ñan kiñ eo, “Nebukadnezar, kōmij jab aikuj in uwaak kōn men in.
- [17] Eļañne enaaj āindein, am Anij Eo kōmij korijer ñan E, Emaroñ in loṃoṃoren kōm jān upaaj in kijeek ebwil, im Enaaj loṃoṃoren kōm jān peōm.
- [18] Ak eļañne jab, kwōn jeļā O kiñ bwe kōm ban korijer ñan anij ro am ak kabuñ ñan ekjab gold eo kwar kajutake.”
- [19] Innām Nebukadnezar ear obrak kōn illu, im turin mejan ear oktak ñae Shadrak, Meshak, in Abednego. Ear kōnono im ba bwe ren kamāānān upaaj eo jiljilimjuon alen jān joñan eo rekijoñ in kōmmane.
- [20] Im ear ba bwe jet ian ri tariṃae ro re dipen jān jar in tariṃae eo an ren liāpe Shadrak, Meshak, im Abednego im ren juļok er ilo upaaj in kijeek ebwil.
- [21] Innām raar liāpe loṃarein ilo kopā ko, jedoujij ko, at ko im nuknuk ko jet ko aer, im raar juļok er ioļapen upaaj in kijeek ebwil.
- [22] Kōn men in, kōn an kanooj mōkaj naan eo an kiñ eo, im upaaj eo ear kanooj bwil, urur in kijeek eo ear man loṃaro ro raar kotak Shadrak, Meshak, im Abednego.
- [23] Ak loṃarein jilu, Shadrak, Meshak, im Abednego, raar wōtļok ioļapen upaaj in kijeek ebwil ke emōj liāpe er wōt.
- [24] Innām Kiñ Nebukadnezar ear bwilōñ, im ear mōkaj in jutak. Ear kōnono im ba ñan irooj ro an, “Kōm ar jab joļok jilu emmaan emōj liāpe er ñan lowaan kijeek eo ke?” Raar uwaak im ba ñan kiñ eo, “Mool, O kiñ.”
- [25] Ear uwaak im ba, “Ij lo emān emmaan rejab liāp, im rej etetal ioļapen kijeek eo, im rejab jorrāān. Im wāween eo kein ka emān ej āinwōt juon nejin anij raṃ.”
- [26] Innām Nebukadnezar ear kepaak ñan kōjjām in upaaj in kijeek ebwil. Ear kōnono im ba, “Shadrak, Meshak, im Abednego, ri korijeran Anij Eutiejtata, komwin diwōjtok im itok ñan ije.” Innām Shadrak, Meshak, im Abednego raar diwōjtok jān ioļapen kijeek eo.

- [27] Im satrap ro, prefect ro, irooj ro, im ri utiej ro an kiñ eo raar kweiloktok im lo bwe ear ejjelok kajoor an kijeek eo ion ānbwinnen ļōmarein, im ear jab rirare kooļan baraer, im kopā ko aer raar jab jorrāān, im raar jab bwın kijeek.
- [28] Nebukadnezar ear kōnono im ba, “Eṃōṇōṇō Anij an Shadrak, Meshak, im Abednego, Eo ear jilkintok enjel eo An im ļomōoren ro ri korijeran ro raar lōke E im kajekdoon naan eo an kiñ eo, im raar liļok ānbwinneir bwe ren jab korijer ak kabuñ ñan jabdewōt bar juon anij ijellōkin Anij eo aer.
- [29] Im ij kōmman juon kien bwe jabdewōt armej ak aelōñ ak armej in aolep kajin eo ej kōnono ñae Anij eo an Shadrak, Meshak, im Abednego, renaaj bukwe ilo mōttan ko im kōmmane mweo imōn juon jikin menoknok. Bwe ejjelok bar anij emaroñ ļomoor ilo wāween in.”
- [30] Innām kiñ eo ear lemaanļok Shadrak, Meshak, im Abednego ilo bukwōn in Babilon.

#### JEPTA 4

- [Da 4.1] Kiñ Nebukadnezar ñan aolep armej, im aelōñ, im armej ro e oktak kajin ko aer, ro rej jokwe ilo aolepen laļ, “Komwin lukkuun jeraamman.
- [2] Eṃman ippa bwe in kwaļok kakōļle ko im men in kabwilōñlōñ ko Anij Eutiejtata ear kōmman ñan eō.
- [3] Enañin ļap kakōļle ko An im kajoor men in kabwilōñlōñ ko An. Aelōñ eo An ej juon aelōñ ñan indeeo, im Enaaj Irooj jān epepen ñan epepen.
- [4] Ņa Nebukadnezar, iar kakkije ilo mweo imō im jeraamman ilo mōn irooj eo aō.
- [5] Iar lo juon ettōnak, im ear kamijak eō. Im ļōmņak ko aō ion kiniō im vision ko an bara raar kalōñņōñ eō.
- [6] Kōn men in iar jiroñ bwe ren āñintok imāo aolep ri mālōtlōt ro an Babilōn bwe ren kaalikar ñan eō meļeļein ettōnak eo.
- [7] Innām ro ri marmir, ro ri anijnij, ro ri Kaldia, im ro ri bubu raar itok. Im iar kōnnaanōk ettōnak eo imāer, ak raar jab maroñ kwaļok meļeļein ñan eō.
- [8] Im āliktata ear itok imāo Daniel, eo etan eo juon Belteshazar ekkar ñan etan anij eo aō, im ilo e ej jetōb an anij ro rekwōjarjar. Im iar kwaļok ettōnak eo ñan e.
- [9] “Belteshazar, irooj an ro ri marmir, ijeļā bwe jetōb an anij ro rekwōjarjar ej ilo eok im ejjelok men in ettino epen ñan eok. Kwōn ba ñan eō vision an ettōnak eo iar loe kab meļeļein.
- [10] Erkein vision ko an bara ke iar pād ion kiniō: iar reiļok, im lo, ear wor juon wōjke ioļapen laļ in, im ear kanooj utiej.
- [11] Wōjke in ear eddekļok im pen, im jabōn ear tōpar lañ; aolep ilo laļ in raar maroñ lo e.
- [12] Ear aiboojoj bōlōken im elōñ leen, im ear wor mōña ñan aolep ilo e. Men in mour an meļaaj raar lo jikin ellor iumwin, im bao in lañ raar jokwe ilo ra ko raan, im aolep men in mour raar mōññ jān e.
- [13] Ilo vision ko an bara ke iar pād ion kiniō, iar reiļok, im lo, juon ri lale im ri kwōjarjar ear wanlaļtak jān lañ.
- [14] Ear kwaļok kōn ainikien eļap im ba āindein, “Komwin juoke wōjke eo im jeke raan; joļok bōlōken im kejeplōklōk leen. Men in mour ko ren ko jān iumwin im bao ko jān ra ko raan.

- [15] Bōtab, koṃwin likūt dāpin im okran ilo laḷ, eṃōj liāpe kōn māl im jinibōrōrō ipelaakin, ilo ujoij in āne eo; im en tutu kōn molawi jān lañ, im en pād ippān men in mour ilo ujoij in āne eo.
- [16] Būruen en oktak jān eo an juon eṃṃaan, im ren leḷok ñan e būruen juon men in mour. Im en āindein iuṃwin jiljilimjuon iien ko.
- [17] Kien in ej naan an ro ri lale, im pepe in ej ḷōmṃak an ri kwōjarjar ro, im un eo ej bwe ro rej mour ren jeḷā bwe Eo Eutiejtata Ej Irooj ion aelōñ ko an armej, im Ej liḷoki ñan ro Ekōṃaan, im Ej kajutak ioer armej rettā.
- [18] Ña Nebukadnezar, iar lo ettōnak in. Im kwe, Belteshazar, kwōn kwaḷok meḷeḷein imaō, bwe aolep ri mālōtlōt an aelōñ eo aō rejab maroñ in kwaḷoktok meḷeḷein. Bōtab kwe, komaroñ, bwe jetōb in anij ro rekwōjarjar ej ilo eok.”
- [19] Innām Daniel, eo āt eo juon Belteshazar, ear pok iuṃwin jidik iien, im ḷōmṃak ko an raar kalōḷṃoñ e. Kiñ eo ear kōnono im ba, “Belteshazar, ettōnak eo im meḷeḷein ren jab kalōḷṃoñ eok.” Belteshazar ear uwaak im ba, “Aō irooj, yokwe bwe ettōnak eo en kar ñan ro rej dike eok im meḷeḷein ñan ri kōjdāt ro aṃ!
- [20] Wōjke eo kwar loe , eo ear eddekḷok im pen, im jabōn ear tōpar lañ, im aolep ilo laḷ raar lo e,
- [21] im eo ear aiboojoj bōlōken im elōñ leen, im ear wor ṃōñā ñan aolep ilo e, im men in mour an meḷaaj raar jokwe iuṃwin, im bao in lañ raar jokwe ilo ra ko raan,
- [22] ej kwe eo, O kiñ. Bwe eṃōj aṃ erom juon eo eḷap im kajoor. Im aṃ ḷap ear eddekḷok im tōpar lañ im aṃ aelōñ ñan jeṃḷoken laḷ.
- [23] Im āinwōt kiñ eo ear lo juon ri lale, juon eo ekwōjarjar, wanlaḷtak jān lañ im ba, “Koṃwin jeke wōjke eo im kōkkure. Bōtab, koṃwin likūt dāpin im okran ilo laḷ, eṃōj liāpe kōn māl im jinibōrōrō ipelaakin, ilo ujoij in āne eo; im en tutu kōn molawi jān lañ, im en pād ippān men in mour ilo ujoij in āne eo, im en āindein iuṃwin jiljilimjuon iien ko.”
- [24] Eñin meḷeḷein, O kiñ, im kien eo an Eo Eutiejtata eo ej ñan kwe, aō irooj kiñ.
- [25] Innām renaaj kako eok jān armej, im kwōnaaj jokwe ippān men in mour an meḷaaj, im renaaj najdik eok kōn ujoij āinwōt juon kau koṃaan, im kwōnaaj tutu kōn mōlawe jān lañ, im jiljilimjuon iien enaaj ellā iom, ṃae iien aṃ jeḷā bwe Eo Eutiejtata ej Irooj ion aelōñ ko an armej im Ej liḷoki ñan ro Ekōṃaan.
- [26] Im bwe raar ba bwe ren likūt dāpin im okran wōjke eo, aelōñ eo aṃ enaaj jepḷaakwōj ñe eṃōj aṃ jeḷā bwe lañ ej irooj.
- [27] Kōn men in O kiñ, naan in kapilōk eo aō en eṃṃan ippaṃ, im kwōn ilok jān jerōwiwi ko aṃ kōn aṃ kōṃṃan wānōk im jān nana ko aṃ kōn aṃ tūriaṃokake ro rejeramōl bwe bōlen en etto wōt aṃ jeraaṃṃan.”
- [28] Aolepen men kein raar waḷok ñan Kiñ Nebukadnezar.
- [29] Ālikin joñoul ruo allōñ ke ear etetal ion ṃweo ṃōn irooj eo ilo bukwōn in Babilon,
- [30] kiñ eo ear kōnono im ba, “Men in ejab Babilon eḷap ke eo ña iar kalek ñan jikin jokwe an irooj kōn aō kajoor eḷap im ñan koutiej aō aiboojoj?”
- [31] Ke naan eo ear pādwōt ilo loñin kiñ eo, juon ainikien ear wanlaḷtak jān lañ im ba, “Eṃōj pepe kōn kwe, Kiñ Nebukadnezar; eṃōj bōk aelōñ eo aṃ jān eok.

- [32] Im renaaj kako eok jān armej, im kwōnaaj jokwe ippān men in mour an meļaaaj, im renaaj najdik eok kōn ujoij āinwōt juon kau koṃaan, im jiljilimjuon iien enaaj ellā jān eok ṃae iien kwōjeļā bwe Eo Eutiejtata ej Irooj ion aelōñ ko an armej im Ej liļōki ñan ro Ekōṃaan.”
- [33] Innām ear ṃōkaj an naan eo kōn Nebukadnezar jejjet. Im raar kako e jān ippān armej, im ear ṃōñā ujoij āinwōt juon kau koṃaan, im ānbwinnen ear tutu kōn mōlawi jān lañ, ṃae iien koolan ear eddek āinwōt juon igol im akin ear āinwōt bao.
- [34] Innām ke ejemļok raan ko, ña Nebukadnezar, iar reilōñļok ñan lañ, im aō jeļāļokjen ear roltok ñan eō, im iar kaṃōṃōṃōik Eo Eutiejtata, im iar nōbar im kaiboojoj Eo ej mour ñan indeeo:  
Ej Irooj jān indeeo ñan indeeo,  
im aelōñ eo An ej jān epepen ñan epepen.
- [35] Im aolep ro rej jokwe ion laļ rej āinwōt ejjeļok,  
Ak Ej kōṃṃan āinwōt Ekōṃaan ilo jar ko an lañ im ro rej jokwe ion laļ,  
Im ejjeļok emaroñ bōbrae Pein ak ba, “Ta eo Kwar kōṃṃane?”
- [36] Im ilo iien eo aō jeļāļokjen ear roltok ñan ippa, im aō utiej im wuj raar roltok ñan eō kōn aiboojoj an aelōñ eo aō, im ri utiej ro aō im irooj ro aō raar pukōt eō. Innām emōj kapen eō ion aelōñ eo aō, im utiej eļap ar kobaik ñan eō.
- [37] Kiiō, ña, Nebukadnezar, ij nōbar im koutiej im kaiboojoj Kiñ an lañ, bwe aolep jermal ko An reṃool im ial ko An rejimwe, im Emaroñ kōttāik aolep ro rej etetal ilo juwa.”

#### JEPTA 5

- [Da 5.1] Kiñ Belshazzar ear kōṃṃan juon kwōjkwōj eļap ñan juon tausan ian irooj ro an, im ear idaaak wain imāan tausan eo.
- [2] Ke ear edjoñ wain, Belshazzar ear jiroñ bwe ren bōktok kab ko gold im silver ko Nebukadnezar jeman ear bōk jān tempel eo ilo Jerusalem, bwe e im irooj ro an im liṃaro pāleen im konkubain ro an ren idaaak jān i.
- [3] Innām raar bōktok kab ko gold ko emōj bōkitok jān tempel an ṃōn Anij eo ej ilo Jerusalem, im Kiñ eo im irooj ro an im liṃaro pāleen im konkubain ro an raar idaaak jān i.
- [4] Raar idaaak wain, im raar nōbar anij ro an gold, silver, jinibōrōrō, māāl, aļal, im dekā.
- [5] Innām addin pein juon armej ear waļok, im ear jeje ion kiin ṃweo imōn kiñ eo ikijjien jikin lamp eo. Im kiñ eo ear lo ṃōttan pa eo ear jeje.
- [6] Innām turin mejen kiñ eo ear oktak, im ear kor, im ear booļoļ ṃokwōj ko an ipin, im bukween neen raar itaak ippān doon.
- [7] Kiñ eo ear ļaṃōj kōn juon ainikien eļap bwe ren āñintok ro ri anijnij, ro ri Kaldia, im ro ri bubu. Innām Kiñ eo ear kōnono im ba ñan ro ri mālōtlōt an Babilon, ‘Jabdewōt eo ej kōnono jeje in im kwaļok meļeļein ñan eō, renaaj kanuknuk e kōn piolōt im likūt juon marmir gold ion kenwan im enaaj irooj eo kein kajilu an aelōñ eo.”
- [8] Innām aolep ri mālōtlōt ro an kiñ eo raar deļoñ, ak raar jab maroñ kōnono jeje eo im kwaļok meļeļein ñan kiñ eo.
- [9] Innām Kiñ Belshazzar ear kanooj lōļṃoñ, im ear oktak turin mejen, im irooj ro an raar pok.
- [10] Lerooj eo ear deļoñ ilo ṃōn kwōjkwōj eo kōn naan ko an kiñ eo im irooj ro. Im ear kōnono im ba, “O Kiñ, kwōn mour indeeo. Kwōn jab kor, im en jab oktak turin mejōṃ.

- [11] Ewor juon emmaan ilo aelōn in am eo ilowaan ej jetōb an anij ro rekwōjarjar. Im ilo raan ko an jemaṃ emōj lo jeļāļokjen, loļokjeṃ, im mālōtlōt ilo e āinwōt mālōtlōt an anij ro. Im jemaṃ Kiñ Nebukadnezar, aet, jemaṃ, kiñ eo, ear likūt e irooj ion ro ri marmir, ro ri anijnij, ro ri Kaldia, im ro ri bubu.
- [12] Emōj lo ilo Daniel, eo Kiñ eo ear ṅaetan Belteshazar, juon jetōb emman, im loļokjeṃ, im maroñ in kameļeļeik ettōṅak ko, im maroñ in kwaļok meļeļein men ko repen im mejaļe pok ko. Innām ren kūrtok Daniel, im enaaj kwaļok meļeļein.”
- [13] Innām raar bōktok Daniel imaan Kiñ eo. Kiñ eo ear kōnono im ba ṅan Daniel, “Kwe Daniel eo jān ro nejin ri jepokwe an Juda, ro jema, Kiñ eo, ear bōktok jān Juda ke?
- [14] Im iar roñ bwe jetōb an anij ro ej ilo eok im bwe emōj lo jeļāļokjen, loļokjeṃ, im mālōtlōt eļap ilo eok.
- [15] Kiiō raar āñintok imao ro ri mālōtlōt im ri anijnij bwe ren kōnono jeje in im kaalikkar ṅan eō meļeļein, ak raar jab maroñ in kwaļok ṅan eō meļeļein men in.
- [16] Im iar roñ kōn kwe bwe komaroñ in kameļeļeik im mejaļ pok ko. Kiiō eļañne komaroñ kōnono jeje eo im kaalikkar ṅan eō meļeļein, renaaj kanuknuk eok kōn piolōt im likūt juon marmir gold ion kenwaam, im kwōnaaj irooj eo kein ka jilu an aelōn eo.”
- [17] Innām Daniel ear uwaak im ba imaan kiñ eo, “Men in letok ko ren am wōt, im kwōn leļok oṅeaō ṅan bar juon. Ijoke, inaa j kōnono jeje eo ṅan kiñ eo im kwaļok meļeļein ṅan e.
- [18] O kiñ, Anij eo Eutiejtata ear liļok ṅan Nebukadnezar jemaṃ juon aelōn im kajoor, im utiej, im wuj.
- [19] Im kōn kajoor eo Ear leļok ṅan e, aolep armej ro, aelōn ko, im armej in aolep kajin raar wuddidd im mijak imaan mejen. Jabdewōt eo ear kōṅaan ear ṃane, im jabdewōt eo ear kōṅaan ear likūt bwe en mour, im jabdewōt eo ear kōṅaan ear koutiej e, im jabdewōt eo ear kōṅaan ear kōttaik e.
- [20] Bōtab ke ear utiej būruen im juwa im ear loṃaan, emōj jolaļok e jān tūroon in kiñ eo an, im raar bōkļok an wuj jān e.
- [21] Im emōj kako e jān ro nejin armej, im būruen ear erom āinwōt an juon men in mour, im jikin jokwe eo an ear ippān ass ko rawia; raar najdik e kōn ujouj āinwōt juon kau koṃaan, im ānbwinnen ear tutu kōn mōlawe jān lañ, ṃae iien ear jeļā bwe Anij Eutiejtata ej Irooj ion aelōn ko an armej, im ej kajutak ioer jabdewōt eo ekōṅaan.
- [22] Ak kwe nejin, Belshazzar, kwar jab kōttāik būruōṃ meñe kwar jeļā aolepen men kein.
- [23] Im kwar make koutiej eok ṅae Irooj in lañ, im raar bōktok imaan kab ko jān ṃweo imōn, im kwe im irooj ro am im liṃaro pāleōṃ im konkubain ro am koṃ ar idaak wain jān i; im kwar nōbar anij ro an silver im gold, jinibōrōrō, māāl, aļal, im dekā, ko rejab elolo ak roñjake ak jeļā. Ak Anij in, menono eo am im aolep ial ko am rej ilo Pein, kwar jab kaibojoj.
- [24] Innām emōj jilkinwōj ṃōttan pa eo jān E, im emōj je jeje in.
- [25] Im eñin jeje eo emōj je, MENE MENE TEKEL UPARSIN.
- [26] Eñin meļeļein men eo: MENE, Anij ear bwine iien in am irooj im Ej kajemļoke.
- [27] TEKEL; emōj boun eok ilo kein boun eo, im emōj lo bwe kwō likjab.
- [28] PERES; emōj karājeti aelōn eo am im leļoke ṅan ro ri Mid im ri Persia.

- [29] Innām Belshazzar ear jiroñ, im raar kanuknuk Daniel kōn piolōt im likūt juon marmir gold ion kenwaan, im raar kōjjeļā bwe en irooj eo kein ka jilu an aelōñ eo.
- [30] Im ilo boñ eo wōt, eṃōj ṃan Belshazzaer kiñ an ro ri Kaldia.
- [31] Innām Darius, ri Mid, ear bōk aelōñ eo ke ear tarin jiljinoñoul ruo an iio.

## JEPTA 6

- [Da 6.1] Im ear eṃṃan ippān Darius bwe en kajutak ion aelōñ eo jibukwi roñoul satrap ro renaaj ion aolepen aelōñ eo,
- [2] im jilu irooj reļap ioer, im Daniel ear juon iaer. Men in ej bwe satrap ro ren uwaak ñan er bwe kiñ eo en jab jorrān.
- [3] Innām Daniel in ear utiej jān irooj ro reļap im satrap ro kōnke ear wor juon jetōb eṃṃan ilo e. Im Kiñ eo ear ļōṃṃak in kajutak e ion aolep aelōñ eo.
- [4] Innām irooj reļap ro im satrap ro raar pukōt bwe ren lo unin kinaakļok Daniel ikijjien jermal an aelōñ eo, bōtab raar jab maroñ lo juon bōd ak likjab, bwe ear tiljek, im ear ejjeļok ruōn ak bōd ilo e.
- [5] Innām ļōṃarein raar ba, “Jeban lo unin kinaakļok Daniel ñe ab jej lo e ikijjien kien Anij eo an.”
- [6] Innām irooj reļap ro im satrap ro raar kweiļok ñan ippān kiñ eo, im āindein aer kōnono ñan e, “Kiñ Darius, kwōn mour indeeo.
- [7] Aolep irooj reļap ro an aelōñ in, prefect ro, im satrap ro, ri utiej ro, im irooj ro raar pepe ippān doon bwe kiñ eo en kōṃṃan juon kien im kapene bwe en jejjet kitien, bwe jabdewōt eo ej kajjitōk juon men jān jabdewōt anij ak armej iuṃwin jilñoul raan, ijjeļokōṃ, O Kiñ, ren joļok e ilo juon roñ in laiōn.
- [8] Kiiō, O kiñ, kwōn kapen kien eo im jaini jeje eo bwe en jab oktak ekkar ñan kien ro ri Mid im ri Persia eo ejab maroñ oktak.”
- [9] Kōn men in, Kiñ Darius ear jaini jeje eo, aet, kien eo.
- [10] Im ke Daniel ear jeļā bwe eṃōj jaini jeje eo, ear etal ñan ṃweo iṃōn. Im windo ko ilo rum eo an ilōñ raar peļļok ñan Jerusalem. Im ear bukwelōlō jilu alen ilo raan, im ear jar im nōbar Anij āinwōt ekar kōṃṃane ṃokta.
- [11] Innām ļōṃaran raar kweiļok ippān doon im lo Daniel ke ear jar im akweļap ñan Anij eo an.
- [12] Innām raar kepaak ñan kiñ eo im kōnono ñan e kōn kien eo. “O kiñ, kwar jab jaini juon kien ke bwe jabdewōt armej eo ej kajjitōk jān jabdewōt anij ak armej iuṃwin jilñoul raan ijjeļokōṃ, O kiñ, bwe renaaj joļok e ilo juon roñ in laiōn?” Kiñ eo ear uwaak im ba, “Eṃool men in im ej ekkar ñan kien ro ri Mid im ri Persia eo ejab maroñ oktak.”
- [13] Innām raar uwaak im ba ñan kiñ eo, “Daniel, eo ej juon ian ro ri jepokwe jān Juda, ejab koutiej eok ak jeje eo kwar jaini, ak jilu alen ilo raan ej kwaļok wōt jar ko an.”
- [14] Innām kiñ eo, ke ear roñ men in, ear kanoj būromōj, im ear kate e bwe en kōtļok Daniel. Im ṃae iien etuļok aļ ear kajjioñ in loṃooren e.
- [15] Innām ļōṃarein raar kweiļok ñan ippān kiñ eo im ba ñan kiñ eo, “Kwōn jeļā, O kiñ, bwe ej kien an ro ri Mid im ri Persia bwe ejjeļok jeje ak kien eo kiñ ear kapene emaroñ oktak.”
- [16] Innām kiñ eo ear jiroñ, im raar bōktok Daniel im joļok e ṅa ilo roñ in laion. Kiñ eo ear kōnono im ba ñan Daniel, “Anij eo aṃ, Eo kwōj korijer ñan E aolep iien, En loṃooren eok.”

- [17] Im raar bōktok juon dekā im likūte ion mejen roñ eo. Im kiñ eo ear sili kōn riñ eo an im riñ ko an irooj ro bwe men eo ikijjien Daniel en jab oktak.
- [18] Innām kiñ eo ear etal ñan m̄weo im̄ōn, im ear jit̄lok boñ eo, im raar jab bōktok jabdewōt kein kaṃōṃōṃō ñan e. Im an kiki ear ko jān e.
- [19] Innām kiñ eo ear jerkak jibboñtata, ke eraantak, im ear m̄okaj̄lok ñan roñ in laion.
- [20] Im ke ear kepaak roñ eo, ear kūr ñan Daniel ilo juon ainikien e inepata. Kiñ eo ear kōnono im ba ñan Daniel, “Daniel, ri korijer an Anij eo Ej mour, Anij eo aṃ, Eo kwōj korijer ñan E aolep iien, Ear maroñ in l̄m̄oṃoren eok jān laion ko ke?”
- [21] Innām Daniel ear ba ñan kiñ eo, “O kiñ, kwōn mour indeeo!
- [22] Anij eo aō ear jilkintok enjel eo An, im ear kiili l̄ōñin laion ko, im raar jab k̄okkure eō, kōnke ear jab lo ruō im̄aan mejen; kab ijañin kōm̄man bōd ñan kwe, O kiñ.”
- [23] Innām kiñ eo ear kanooj m̄ōṃōṃō, im ear jiroñ bwe ren kotak Daniel jān roñ eo. Im raar kotak Daniel jān roñ eo, im raar jab lo jabdewōt jorrāān ñan e bwe ear lōke Anij eo an.
- [24] Im kiñ eo ear jiroñ, im raar bōktok l̄ōmaraṃ ro raar kinaak̄lok Daniel, im raar jolal̄lok er ñan lowaan roñ in laion ko, er, ro nejeir, im lim̄aro p̄aleir. Im laion ko raar anjo ioer im kwōjkwōje aolep di ko dier m̄okta jān aer tōpar kapin roñ eo.
- [25] Innām Kiñ Darius ear jeje ñan aolep armej ro, aelōñ ko, im armej ro e oktak kajin ko aer, ro rej jokwe ilo aolepen laj: “Jeraam̄man ñan koṃ.
- [26] Ij kōm̄man juon kien bwe ilo aolep bukwōn aelōñ eo aō, armej ren wudidid im mijak im̄aan Anij eo an Daniel, bwe E Anij e mour im Ej pād ñan indeeo, im aelōñ eo An ejjel̄ok enaaj k̄okkure, im Enaaj Irooj ñan indeeo.
- [27] Ej l̄m̄oṃor im kōt̄lok im Ej kōm̄man kakōl̄le ko im men in kabwilōñlōñ ilo lañ im ion laj. E eo Ear l̄m̄oṃoren Daniel jān kajoor an laion ko.”
- [28] Im Daniel in ear jeraam̄man wōt ke Darius ear irooj im ke Sairōs ri Persia ear irooj.

## JEPTA 7

- [Da 7.1] Ilo iiō kein ka juon an Belshazzar kiñ ion Babilon, Daniel ear lo juon ettōṃak im vision ko ilo baran ke ear babu ion kinien. Innām ear je ettōṃak eo im kwaṃlok m̄ōttan eaorōk an men eo.
- [2] Daniel ear kōnono im ba, “Iar reiṃlok ilo vision ko ilo boñ, im lo, kōto ko em̄an an lañ raar poktake lom̄alo eo eṃap.
- [3] Im em̄an men in mour ko reṃap, kaju jān doon, raar wanlōñl̄ok jān lom̄alo eo.
- [4] Eo m̄okta ear āinwōt juon laion im elōñ an pein bao āinwōt an juon igōl. Iar lale m̄ae iien em̄ōj tumi pein bao ko an, im em̄ōj kotak e jān laj im kajutak e ion neen āinwōt juon armej; innām em̄ōj leṃlok būruen armej ñan e barāinwōt.
- [5] Im lo, men in mour eo kein ka ruo ear āinwōt juon bear. Im ear jutak ion katin, im ear wor jilu di ikōtaan ñiin. Im āindein aer kar ba ñan e, “Kwōn jerkak im kañ elōñ kanniōk.”
- [6] Im ālikin men in iar reiṃlok wōt, im lo, ear wor bar juon men in mour āinwōt juon leopard, im ear wor em̄an pein bao ion likin, im elōñ em̄an baran, im em̄ōj leṃlok ñan e bwe en irooj.
- [7] Im ālikin men in iar reiṃlok wōt ilo vision ko ilo boñ, im lo, ear waṃlok men in mour eo kein ka em̄an. Ear kamijak im kalōl̄ñoñ im kanooj dipen, im elōñ ñiin māāl kilep. Ear m̄ōñā im kwōjkwōje, im ro raar pād wōt ear juri kōn neen . Im ear oktak jān aolep men in mour ko raar m̄okta jān e, im elōñ joñoul doon.

- [8] Ke iar kalṃōnḷokjeṅ kōn doon ko, lo, bar juon doon, edik, ear wanlōñḷok ibwiljeir, im eṃōj tumi jilu ian doon ko ṃokta iṃaan. Im lo, ilo doon in, elōñ mejen āinwōt mejen armej , im elōñ loñin eo ear kōnono ilo juwa.
- [9] Iar reiḷok ṃae iien eṃōj kajutak tūroon ko, im Eo jān indeeo Ear jijet. Nuknuk eo An ear āinwōt sno emouj, im kooḷan baran ear āinwōt kilin jiip erre; tūroon eo an ear bwil kōn kijeek, im neen ear urur kōn kijeek.
- [10] Juon reba in kijeek ear tōṛḷok im diwōjḷok iṃaan. Tōujin im tōujin raar korijer ñan E, im joñoul tōujin alen joñoul tōujin raar jutak iṃaan. Ro ilo jikin ekajet raar jijet, Im raar kapelḷok bok ko.
- [11] Innām iar reiḷok wōt kōn ainikien naan ko re juwa me doon eo ear kōnono kaki. Iar reiḷok ṃae iien eṃōj ṃan men in mour eo im eṃōj kōkkure ānbwinnen im joḷok e ṅa ilo kijeek ebwil.
- [12] Eṃōj bōkḷok kajoor eo an men in mour ko jet, ak raar likūt er bwe ren mour iuṃwin jidik iien.
- [13] Iar reiḷok ilo vision ko ilo boñ, im lo, juon āinwōt Nejin Armej ear itok ilo kōdō ko an lañ, im ear kepaak Eo ej jān indeeo, im raar kūrtoḷ E iṃaan.
- [14] Im eṃōj leḷok ñan E kajoor, aiboojoj, im bwe En Irooj, bwe aolep armej, aelōñ ko, im armej in aolep kajin ren karijer ñan E. An kajoor ej juon kajoor ñan indeeo eo eban jako, im aelōñ eo An eban jorrāān.
- [15] Ña, Daniel, ear eddo būruō ilowaō, im vision ko ilo bara raar kalōḷñōñ eō.
- [16] Innām iar kepaak juon ian ro raar jutak, im iar kajjitōk ippān kōn lukkuun meḷeḷein aolepen men in. Im ear kōnono ippa im kameḷeḷeik eō kōn men ko.
- [17] Ewor emān men in mour kein reḷap. Rej emān kiñ ro renaaj jutak ion laḷ.
- [18] Ak ri kwōjarjar ro an Eo Eutiejtata renaaj bōk aelōñ eo, im aelōñ eo enaaj aer ñan indeeo im ñan indeeo im indeeo.
- [19] Innām iar kōṅaan jeḷā rāpeḷtōn men in mour eo kein ka emān eo ear oktak jān ro jet. Eḷap an kamijak, ñiin ear jān māāl, im akiin jān jinibōrōrō. Ear kañ im kōprakilkil im juri ro jet kōn neen.
- [20] Im kōn joñoul doon ko an ko rar ion baran, im kōn bar juon eo ear eddekḷok im iṃaan men in jilu raar buñ. Im elōñ mejen doon en im juon loñin eo ear kōnono men ko reḷap, im wāween ear ḷap jān ko jet.
- [21] Im ke iar lale, doon en ear tariṅaeik ro re kwōjarjar, im ear anjo ioer.
- [22] ṃae iien ear itok Eo jān indeeo, im Ear pepe bwe en win ro rekwōjarjar an Eo Eutiejtata; im ear jejjet iien eo ke ro rekwōjarjar raar bōk aelōñ eo.
- [23] Im ear ba, “men in mour eo kein ka emān ej juon aelōñ kein ka emān eo enaaj waḷok ion laḷ in. Enaaj oktak jān aolep aelōñ ko jet, im enaaj kañ aolepen laḷ im juri im kōjeplōklōke.
- [24] Im doon ko joñoul ilo aelōñ eo rej joñoul kiñ ro renaaj jutak. Im tokālik bar juon enaaj jutak im enaaj oktak jān ro ṃokta, im enaaj kōttāik jilu ian kiñ ro.

- [25] Im enaaj kōnono ɲae Eo Eutiejtata im kaeñtaan ro re kwōjarjar an Eo Eutiejtata. Im enaaj pukōt bwe en ukōt iien ko im kien ko; im enaaj mōj an liḷok er ɲa ilo pein iumwin juon iien, iien ko, im jimattan iien.
- [26] Ak jikin ekajet eo enaaj jijet, im renaaj bōk an kajoor jān e, im enaaj jorrān im jako indeeo.
- [27] Innām renaaj liḷok maroñ im kajoor im ɲapen aolep aelōñ ko iumwin aolepen lañ ñan armej ro rekwōjarjar an Eo Eutiejtata. Aelōñ eo An ej juon aelōñ ñan indeeo im aolep maroñ ko renaaj karijer ñan E im pokake E.”
- [28] Eñin jemḷoken men eo. Ak kōn ña, Daniel, ɲomḷak ko aō raar kanooj kainezataik eō, im meja ear oktak, ak iar kōjparok men eo ilo būruō.

## JEPTA 8

- [8.1] Ilo iiō eo kein ka jilu an Kiñ Belshazzar irooj, juon vision ear waḷok ñan eō, ñan ña, Daniel, ālikin eo ear waḷok ñan eō mōkta.
- [2] Im iar reiḷok ilo vision eo, im ke iar reiḷok, iar pād ilo mōn bar eo ilo Susa eo ej ilo bukwōn in Elam; im iar reiḷok ilo vision eo, im iar pād iturin reba Ulai.
- [3] Im iar kotak meja im reiḷok, im lo, juon ram eo elōñ ruo an doon ear jutak imaan reba eo. Im doon ko re aitok, ak juon ear aitok jān eo juon, im eo e aitokḷok ear wanlōñḷok āliktata.
- [4] Im iar lo ram eo iun ñan rālik, im eañ, im rōk; im ejjeḷok men in mour ear maroñ in jutak imaan, im ejjeḷok ear maroñ lomōor jān pein. Im ear kōmḷan ekkar ñan ankilaan wōt, im ear ɲapḷok.
- [5] Im ke iar ɲomḷak kake, lo, juon got koḷaan ear itok jān rālik, im ear kajoone aolepen laḷ, ak ear jab juri laḷ. Im ear wor juon doon eḷap ikōtaan mejen.
- [6] Im ear iḷok ɲae ram eo elōñ an ruo doon eo iar lo jutak imaan reba eo; im ear ettōr ɲae e ilo illu eḷap.
- [7] Im iar lo e kepaak ram eo, im ear kanooj illu ippān, im ear itaak ram eo im bwilok doon ko ruo an, im ear ejjeḷok kajoor ilo raam eo bwe en jutak imaan. Innām ear jolaḷḷok e ñan laḷ im juri, im ear jab wor juon bwe en lomōoren ram eo jān kajoor eo an.
- [8] Im got koḷaan eo ear kanooj ɲapḷok. Ak ke ear kajoor, doon eḷap eo an ear bwilok, im emān doon reḷap raar wanlōñḷok ilo jikin ñan kōto ko emān iumwin lañ.
- [9] Im jān juon iaer ear wanlōñḷok juon doon edik. Im ear kanooj ɲapḷok ñan rōk, im reaar, im āne eo emḷan.
- [10] Im ear ɲapḷok ñan jar ko ilañ; im ear kowutḷok ñan laḷ jet ian jar ko im iju ko, im ear juri er.
- [11] Im ear make kaḷapḷok e bwe en joñan wōt Irooj an jar eo. Im ear kamōjḷok katok eo ekar ñan E aolep iien, im emōj jolaḷḷok jikin kwōjarjar eo An.
- [12] Im kōn bōd, emōj liḷok ñan e jar eo koba katok eo ekar aolep iien. Im ear joḷok mool ñan laḷ, im ear wanḷaanḷok im jeraamḷan.
- [13] Innām iar roñ juon ri kwōjarjar kōnono, im juon ri kwōjarjar ear ba ñan eo ear kōnono mōkta, “Ewi toñ an naaj jejjet vision eo kōn katok eo im kōn jumae eo ej kajeepelḷok im ñe emōj liḷok jar eo im jikin kwōjarjar eo bwe en juri?”
- [14] Im ear ba ña eō, “Mae iien ruo tausen, jilu buki jota im jibboñ, innām jikin kwōjarjar eo enaaj erreō.”

- [15] Im ña, Daniel, ke iar lale vision eo, im iar pukõt mejelein, lo, juon eo ear ãinwõt juon emmaan ear jutak imãd.
- [16] Innãm iar roñ ãinikien juon armej eo ear ikõtaan tõrerein Ulai eo, im ear kūr im ba, “Gabriel, kwõn kamejeleik lein kõn vision eo.”
- [17] Im ear itok ñan iturin jikin eo iar jutak ie, im ke ear itok, iar mijak im buñpedo. Innãm ear ba ñan eõ, “Nejin armej, kwõn mejele bwe vision eo ej ñan iien ãliktata.”
- [18] Im ke ear kõnono ippa, iar kiki ettoñ im buñpedo. Ak ear uññūr eõ im kajerkak eõ ilo jikiõ.
- [19] Im ear ba, “Lo, inaa kamejeleik eok kõn men eo enaa walok ilo iien illu ãliktata, bwe ej kõn iien eo ejejjet ilo jemlokin.
- [20] Ram eo kwar loe eo elõñ an ruo doon ej kiñ ro an Midia im Persia.
- [21] Im got eo e koojol ej kiñ in Greece; im doon eo elap eo ear ikõtaan mejen ej kiñ eo moktata.
- [22] Im ke men eo ear bwilok, emãn raar jutak iumwin; rej emãn kiñ jãn aelõñ eo an rej jutak, ak rejab kajoor joñan wõt e.
- [23] Im ilo jemlokin iien aer irooj, ñe ro ri jumae remat ilo aer jumae, juon kiñ enaa jutak eo e lej im eo ej mejele men ko re pen.
- [24] Im kajoor eo an enaa lap, ak jab kõn kajoor eo an make. Im enaa kockure elap jãn joñan im wanmaanlok im jeraamman. Im enaa kockure ro re kajoor im armej ro re kwõjarjar.
- [25] Im ilo an mälõtlõt enaa kõmman bwe moñ ko an ren jeraamman, im ilo büruen enaa make kaalaplok e. Enaa man elõñ ke rej pãd ilo aenõmman, im enaa jumae Irooj in irooj ro. Ak enaa jorrãan, im jab kõn an armej kõmmane.
- [26] Im vision eo kõn jota im jibboñ eo emõj kõnnaanõk eok emool; innãm kwõn kiili vision eo, bwe enaa ñan elõñ raan.”
- [27] Innãm ña, Daniel, Iar mõk im nañinmej iumwin jet raan. Innãm iar jerkak bwe in kõmman jermal an kiñ eo. Im iar bwilõñ kõn vision eo, im iar jab mejele.

## JEPTA 9

- [9.1] Ilo iiõ eo mokta an Darius nejin Ehasuirõs eo ear jãn ineen ro ri Mid, eo ear kiñ ion aelõñ in ro ri Kaldi,
- [2] Ilo iiõ eo kein ka juon in an kiñ, ña Daniel, iar mejele kõn bok ko oran iiõ ko me Naan in Jeova ear itok kaki ñan Jeremaia ri kanan, bwe en jiljilimjuonñoul iiõ bwe en tõprak jeepeploke an Jerusalem.
- [3] Innãm iar likūt meja bwe in pukõt Irooj Anij kõn jar im akwelep, jitlok, nuknuk eklep iden, im buñalñal.
- [4] Iar jar ñan Jeova aõ Anij im kwaelok im ba, “O Irooj, Anij eo elap im kaleñõñ, eo Ej kõjparok bujen im tūriamokake ippãn ro rej yokwe E im ippãn ro rej kõjparok kien ko An.
- [5] Kõm ar jerowiwi im kõmman nana im bõt im jumae, im ar jeorlok jãn kien ko Am im ekajet ko Am.
- [6] Im kõm ar jab eoroñ ro ri karijeram, ri kanan ro, ro raar kõnono ilo Etam ñan kiñ ro am, irooj ro am, im ro jemam im ñan aolep armej an ãneo.
- [7] Ñan Kwe, O Irooj, wãnõk; ak ñan kõm, jook wõt, ãinwõt rainin – ñan armej in Juda, ro ri jokwe ilo Jerusalem, im ñan aolepen Israel, ro re pãak im ro rettolok ilo aolep ãne ko Kwar kadiwõjlok er ie, kõn bõd ko raar bõd ñae Eok kaki.

- [8] O Irooj, kōmij jook wōt, kiñ ro am, irooj ro am, im ro jemam, bwe kōm ar jerōwiwi ñae Eok.
- [9] Ippān Irooj ad Anij ewor tūriamokake im joļok bōd meñe jaar jumae E.
- [10] Im kōm ar jab pokake ainikien Jeova ad Anij bwe kōmin etetal ilo kien ko an ko Ear likūt imaad kōn pein ro ri karijeran, ri kanan ro.
- [11] Im aolepen Israel raar kōkkure kien ko Aṃ im jeorļok im jab eoroñ anikiōṃ. Innām emōj lutōkļok lia eo iom, im kanejnej eo emōj je ilo kien Moses, karijeran Anij, bwe kōm ar jerōwiwi ñae E.
- [12] Im Ear kajejjet Naan ko An ko Ear kōnono ñae kōj im ñae irooj ro am ro raar irooj iom, bwe En bōktok iom jorrāān eļap, eo ear jañin kōṃṃan āinwōt iumwin aolepen lañ āinwōt emōj kōṃṃan ñan Jerusalem.
- [13] Ekkar ñan men ko emōj je ilo kien Moses, aolepen naan in ear waļok ñan kōm. Ak kōm ar jab pukōt mejen Jeova am Anij bwe kōmin oktak jān nana ko am im eļļok ñan ṃool ko An.
- [14] Innām Jeova ear kōkōne jorrāān eo im bōktok iom; bwe Jeova am Anij e wānōk ilo aolep men ko Ej kōṃṃani, ak kōm ar jab eoroñ ainikien.
- [15] Im kiiō, O Irooj am Anij, Eo ear kadiwōjļok armej ro doom jān āne in Ijpt kōn pā ekajoor im kōṃṃan ñan eok juon āt āinwōt rainin; kōm ar jerōwiwi; kōm ar bōd.
- [16] O Irooj, ekkar ñan aolepen Aṃ wānōk, kiiō Aṃ illu im illu ebwil ren oktak jān jikin kweiļok eo aṃ, Jerusalem, tol eo Aṃ ekwōjarjar; bwe kōn jerōwiwi ko am im kōn nana ko an ro jemam, Jerusalem im armej ro doom raar men in jeepeļok ñan aolep ro ipelaakeir.
- [17] Im kiiō am Anij, Kwōn roñjake ñan jar an ri karijeram im ñan akweļap ko an, im kōṃṃan bwe turin mejōṃ en romak ion jikin kwōjarjar eo e jeepeļok, kōn Kwe, O Irooj.
- [18] O aō Anij, kwōn kajertok lojilñōṃ im roñjake; kapelļok mejōṃ im lo jeepeļok ko am im jikin kweiļok eo emōj etnake kōn Etaṃ. Bwe kōmij jab lewōj akweļap ko am kōn am wānōk, ak ej kōn tūriamokake ko Aṃ reļap.
- [19] O Irooj, roñjake! O Irooj, joļok bōd! O Irooj, Kwōn eļtok im jermal! Kōn Kwe, O aō Anij, Kwōn jab ruṃwij, bwe emōj etnake jikin kweiļok eo Aṃ im armej ro doom kōn Etaṃ.”
- [20] Im ke I ar kōnono im jar im kwaļok jerōwiwi ko aō im jerōwiwi ko an armej ro doō, Israel; im ke iar leļok akweļap ko aō ñan Jeova aō Anij kōn toļ eo ekwōjarjar an Aō Anij,
- [21] im ke iar jar wōt, armej eo Gabriel, eo iar lo ilo vision eo ṃokta, ear itok ke iar kijeļok, im ear uññūr eō ke enañin iien katok in jota.
- [22] Im ear kameļe im kōnono ippa, im ear ba, “Daniel, kiiō emōj aō iwōj bwe in lewōj meļe im jelāļokjeñ.
- [23] Ilo jinoin aṃ jar, naan eo ear diwōjļok, im ña, iar itok bwe in kōnnaanōk eok, bwe emṃan kwe. Kōn men in, kwōn ļōṃṃak kōn naan eo im meļe vision eo.
- [24] Emōj pepe kōn jiljilimjuonñoul jiljilimjuon ko ion armej ro doom im ion jikin kweiļok eo aṃ ekwōjarjar bwe en kajeṃļok nana im kamatļok jerōwiwi im kōṃṃan men in medek kōn bōd im kadeļoñ wānōk eo ej ñan indeeo, im bwe en kiili vision eo im rikanij eo im bwe en kapit eo ekwōjarjar otem kwōjarjar.
- [25] Innām kwōn jelā im meļe bwe jān iien an diwōj naan eo ñan kōkāāl im kalek Jerusalem ṃae iien an Messaia, Irooj eo, enaaj jiljilimjuon jiljilimjuon ko im jiljinoñoul ruo jiljilimjuon ko; renaaj bar kalek e im enaaj wor jikin eo edapakpak im kōmlaļ, meñe ej iien kaeñtaan.

- [26] Im ālikin jiljinoñoul ruo jiljilimjuon ko, renaaj bukweļok Messaia eo, im enaaj ejjeļok An; im armej ro an irooj eo enaaj itok renaaj kočkure jikin kweļok eo im mōn kwōjarjar eo. Im jemļokin enaaj ilo juon ibwijlelep im mae iien jemļokin enaaj wor tariņae; im emōj pepe bwe en wor jeepeļok ko.
- [27] Im enaaj kapen bujen eo ippān elōñ iumwin juon wiik. Im ioļapen wiik eo enaaj kabōjrak katok im jurtak. Im eo ej kōmman jeepeļok ej itok ion jabōn men in kajōjō, aet, mae iien rej lutōkļok jemļoken emōj pepe kake ion eo ej kajeepeļok.”

## JEPTA 10

- [10.1] Ilo iiō eo kein ka jilu an Sairōs, Kiñ in Pōrsia, juon men emōj kaalikkar ñan Daniel, eo raar etnake Belteshazar. Im men eo ear mool im kōn juon tariņae eļap, im ear meļeļe men eo im ear wor an meļeļe kōn vision eo.
- [2] Ilo raan ko, ña Daniel, iar liaajļo iumwin jilu wiik iio.
- [3] Iar jab mōña mōñā ko renno, kab kanniōk im wain raar jab itok ilo loñiō, im iar jab kapit eō kōn oil ñan jidik mae iien ejejjet jilu wiik iio.
- [4] Ilo raan eo kein ka roñoul emān in allōñ eo mokta, ke iar pād iturin reba eo eļap, Taigris eo, iar reilōñļok im lale, im lo, juon emman emōj kanuknuk e kōn linen, im emōj kañūr e ion ipin kōn gold emman jān Upaz.
- [6] Im ānbwinnen ear āinwōt beril, im turin mejen āinwōt jarom, im mejen āinwōt pāle ko re urur, im pein im neen āinwōt jinibōrōrō ejatiltil. Im ainikien naan ko an ear āinwōt ainikien juon jar eļap.
- [7] Innām ña Daniel, ña wōt iar lo vision eo, ak ļōmaro raar pād ippa raar jab lo visiion eo. Bōtab juon lōļņoñ eļap ear buñ ioer, im raar ko bwe ren pukōt jikin tilekek.
- [8] Im ña wōt iar pād wōt im lo vision in eļap, im ejjeļok kajoor ear pād wōt ilo eō; im meja ear oktak im o, im ekar ejjeļok aō kajoor.
- [9] Im iar roñ ainkien naan ko an. Im ke iar roñ ainikien naan ko an, iar kiki ettoñ ion meja, im iar buñpedo.
- [10] Im lo, juon pa ear uññūr eō, im ear kajutak eō bwe in wudidid ion bukween neiō im ion lo Biden peiō.
- [11] Im ear ba ñan eō, “Daniel, armej emman, kwōn meļeļe naan ko inaj kōnono ñan eok, im kwōn jutak ilo jikōm, bwe kiiō emōj jilkinwōj eō ñan eok.” Im ke ear kōnono ippa naan in, iar jutak im wudidid.
- [12] Innām ear ba ñan eō, “Kwōn jab mijak, Daniel, bwe jān raan eo mokta ke kwar likūt būruōm bwe kwōn meļeļe im bwe kwōn make kōttāik eok imaan aņ Anij, emōj roñjake naan ko aņ, im ij iwōj kōn naan ko aņ.
- [13] Ak irooj in aelōñ in Pōrsia ear jumae eō iumwin roñoul juon raan, innām, lo, Maikōl, juon ian irooj ro reutiej, ear itok im jipañ eō kōnke iar pād ippān irooj ro in Pōrsia.
- [14] Kiiō emōj aō iwōj bwe in kameļeļeik eok kōn men ko renaaj waļok ñan armej ro doom ilo raan ko re lik, bwe visiōn eo ej ñan raan ko rej itok.”
- [15] Im ke ear kōnono naan kein ñan eō, iar jallok ñan laļ, im iar jab maroñ kōnono.
- [16] Innām lo, juon eo ear āinwōt juon armej ear uññūr tiō, im iar kapellok loñiō im kōnono. Im iar ba ñan eo ear jutak Imaō, “Irooj, kōn vision eo, emōj an eñtaan itok ioō, im ejjeļok kajoor ej pād wōt ilo ña.

- [17] Bwe elemen ri karijeran irooj ne aō emaroñ kōnono ippān irooj ne? Im kōn ña, ejjelok kajoor ej pād ilo eō kiiō, im menono e jab pād wōt ilo eō.”
- [18] Innām eo ej āinwōt juon armej ear bar uññūr eō im kakajoor eō.
- [19] Im ear ba, “kwōn jab mijak, kwe armej emman. Aenōmman ñan eok. Kwōn kajoor; kwōn kajoor.” Im ke ear kōnono ippa, iar kajoorlok. Innām iar ba, “Aō irooj en kōnono, bwe kwar kakajoor eō.”
- [20] Innām ear ba ñan eō, “Kwō jelā ke unin aō kar itok ñan ippam? Im kiiō inaaj rool in tariṇae ippān irooj eo an Pōrsia. Im ñe imootlok, lo, irooj in Gris enaaj itok.
- [21] Bōtab inaaj kwaok ñan eok men eo emōj je ilo jeje eo e mool. (Ak ejjelok en ej jutak ippa ilo men kein ijellokin wōt Maikel irooj eo ami.

## JEPTA 11

- [11.1] Im ilo iiō eo kein ka juon an Dariōs ri Mid, iar jutak bwe in kakajoor im kōjparok e.)
- [2] Im kiiō ij kwaok mool ñan eok: lo, ewor wōt jilu kiñ ro renaaj jutak ilo Pōrsia. Innām eo kein ka emān enaaj lukkuun mweie jān aolepeir, im kōn an kajoor im mweiuik ko mweien enaaj poktak aolep nae aelōñ in Gris.
- [3] Innām juon kiñ ekajoor enaaj jutak, im enaaj irooj kōn elap maroñ, im enaaj kōmman ekkar ñan ankilaan.
- [4] Im ke e jutak enaaj jorrān aelōñ eo an, im renaaj ajeñ ñan emān kōto ko in lañ, im eban etal ñan ro ineen, im eban ilo wāween an kar irooj. Ak enaaj tum aelōñ eo an im enaaj an bar jet ijellokin rein.
- [5] Im kiñ eo an rōk enaaj kajoor, kab juon ian irooj ro an, eo enaaj kajoor jān e im irooj, im maroñ eo an enaaj juon maroñ elap.
- [6] Im ālikin jet iiō renaaj kōmman juon bujen ippān doon. Im kōrā eo nejin kiñ eo an rōk enaaj itok ñan kiñ eo eañ bwe ren kōmman juon bujen. Ak lio eban dāpij wōt an kajoor, im leo im kajoor eo an eban pād; ak renaaj lelok lio kab eo ear āñintok e im eo ear keotak e im eo ear kakajoor e ilo iien ko.
- [7] Ak juon jān ro ineen okran enaaj jutak ilo jikin, im enaaj itok nae jar in tariṇae eo im deļoñ ilo me eo an kiñ eo eañ, im enaaj jumae er im anjo.
- [8] Im enaaj barāinwōt bōk āinwōt men in jepokwe ñan Ijpt men kein: anij ro aer ippān men in e ko aer im jāpe ko remman silver im gold, im iumwin jet iiō eban kabnōnō kiñ eo an eañ.
- [9] Innām enaaj deļoñ ilo aelōñ eo an kiñ eo irōk, ak enaaj jeplaak ñan āneo an.
- [10] Innām ro nejin renaaj kalejar im kobaik elōñ jar in tariṇae reļap, im ilo mool juon iaer enaaj itok im ibweeptok im ellā. im bar juon iien enaaj kalejar ñan me eo an.
- [11] Im kiñ eo an rōk enaaj kanooj illu im naaj diwōjlok im tariṇae ippān, aet, ippān kiñ eo an eañ eo enaaj kajutak juon jar elap, ak enaaj mōj an lelok jar eo na ilo pein eo mokta.
- [12] Im ñe emōj kajepokweik jar eo, enaaj utiej būruen; im enaaj kōmman bwe tausen ko ren buñ, ak eban anjo wōt.
- [13] Innām kiñ eo an eañ enaaj kajutak bar juon jar in tariṇae elap jān eo mokta, im ālikin jet iiō enaaj bar itok kōn juon jar in tariṇae elap im elōñ mweiuik.
- [14] Innām, ilo raan ko, elōñ renaaj jutak nae kiñ eo an rōk; ro ri kowadoñ ian ro doom renaaj barāinwōt make kakajoor er bwe en jettet vision eo, ak reban tōprak.

- [15] Im kiñ eo an eañ enaaj itok im kōmman juon be im bōk juon jikin kweilok ekajoor; im jar eo an rōk reban jutak, koba ri tariṇae reṁman ippaer, bwe enaaj ejjelok kajoor ippaer bwe ren jutak.
- [16] Im eo ej itok ṇae e enaaj kōmman ekkar ñan ankilaan, im ejjelok enaaj maroñ in jutak imaan. Im enaaj pād ilo āne eo eaiboojoj, im enaaj wor kōkkure ilo pein.
- [17] Im enaaj kapen mejen bwe en deļoñ ilo kajoor an aolepen aelōñ eo an, im enaaj kōmman bujen in aenōmman ippān. Im enaaj leļok ñan e juon nejin jiroñ bwe en kōkkure e. Ak lio eban jutak kōn e ak pād ippān.
- [18] Innām enaaj jallok ñan āne ko iturin lojet eo im enaaj bōk elōñ. Ak juon kapen enaaj kabōjrak an kajeepelok im enaaj ukōt an jeepeļok ion e make.
- [19] Innām enaaj ukōt mejen ñan me ko an āneo an, ak enaaj tūbbok im buñ, im reban lo e.
- [20] Innām juon enaaj jutak ilo jikin eo enaaj jilkinlok juon ri tōl owōj bwe en pād wōt aiboojoj an aelōñ eo. Ak enaaj jorrāān ālikin jet raan, im eban ilo illu ak tariṇae.
- [21] Innām juon armej enana enaaj jutak ilo jikin, im ion e ejañin leļok utiej in irooj; bōtab enaaj itok ilo iien aenōmman im bōk aelōñ eo kōn moṇ.
- [22] Im juon jar in tariṇae eļap enaaj ibeļok imaan im jorrāān, im barāinwōt irooj an bujen eo.
- [23] Innām ñe eṁōj kōmman bujen in aenōmman ippān, enaaj kōmman moṇ; enaaj wanlōñlok im kajoor kōn iiet wōt armej.
- [24] Im enaaj itok ilo bukōn ko reṁmantata ñe re aenōmman, im enaaj kōmman men eo jeman im ro jeman jeman raar jab kōmmane. Enaaj ajej men in rakim im men in jibwe im ṁweiuk ippaer, im enaaj kōtabalbal ṇae me ko, ak ñan juon iien wōt.
- [25] Im kōn juon jar in tariṇae eļap enaaj make kakajoor im kaperan e ṇae kiñ eo an rōk, im kiñ eo an rōk enaaj kalejar e ñan tariṇae im ippān juon jar in tariṇae ekanooj ļap im kajoor; ak eban jutak, bwe renaaj kōmman pepe ko ṇae e.
- [26] Im ro rej ṁōñā jān kijen renaaj kōkkure e, im jar in tariṇae eo an enaaj ibweeplok, im elōñ renaaj buñ im mej.
- [27] Ak būruen kiñ rein ruo renaaj nana, im renaaj kōnono riab iturin tebōļ eo; ak eban tōprak, bwe enaaj itok wōt jemloken ñe ejejjet iien.
- [28] Innām enaaj jepļaak ñan āneo an im enaaj lōñ ṁweiuk ko ippān, ak būruen enaaj ṇae bujen eo ekwōjarjar. Im enaaj kōmman jet men innām roļ ñan āneo an.
- [29] Ilo iien eo eṁōj pepe kake enaaj roļ im deļoñ ilo rōk, ak iien in āliktata enaaj oktak jān kar ṁokta.
- [30] Bwe waan lojet ko jān Kittim renaaj itok ṇae e. Innām enaaj būromōj im roļ im illu ṇae bujen eo ekwōjarjar im naaj kōmman jet men. Innām enaaj roļ im kwaļok jouj ñan ro rej ilok jān bujen eo ekwōjarjar.
- [31] Im jar ko jān imaan renaaj jutak im kattoon jikin ekwōjarjar eo epen, im renaaj joļok katok eo ej aolep raan. Im renaaj kajutak ekjab eo ej kajeepelok.
- [32] Im kōn naan ko re meo enaaj kattoon ro rej kōmman nana ñan bujen eo. Ak armej ro re jeļā aer Anij renaaj kajoor im kōmman elōñ men.
- [33] Ro re meļeļe ian armej ro renaaj katakin elōñ. Ak renaaj buñ kōn jāje im kijeek im jepokwe im men in rakim iumwin jet raan.
- [34] Ak ñe re buñ, enaaj wor jidik jipañ ñan er; ak elōñ renaaj koba ippaer ilo ankiliriab.

- [35] Im jet ian ro re mejele renaaj buñ bwe en kōkammanmanļok , karreo, im koweepan er mae iien āliktata, bwe enaaj itok wōt ilo iien ejejjet.
- [36] Im kiñ eo enaaj kōmman ankilaan, im enaaj make koutiej e im kaļapļok e ñae anij otemjej, im enaaj kōnono men ko re kabwilōñlōñ ñae Anij in anij ran. Im enaaj jeraamman mae iien ejemļok illu eo, bwe men eo emōj pepe kake enaaj waļok.
- [37] Im eban kaorōk anij ro an ro jimman ak kōñaan eo an kōrā ro, im eban kaorōk jabdewōt anij; bwe enaaj make kaļapļok e jān aolep.
- [38] Ijellokier, enaaj koutiej juon anij in kajoor, juon anij eo ro jimman rar jab jelā kake. Enaaj koutiej e kōn gold im silver im dekā ko re aorōk im men ko remman.
- [39] Im enaaj etal ñae me ko re pentata kōn juon anij ruwa; enaaj ļap an koutiej ro rej kile e, im enaaj kairooj er ion elōñ im naaj ajej āneo kōn oņean.
- [40] Im ilo iien āliktata kiñ eo an rōk enaaj tariņæk e, im kiñ eo an eañ enaaj mokajļok ñan e kōn jariōt, im ro ri uwe ion kiria, im kōn elōñ waan lojet, im enaaj deļoñ ilo āne ko im deļok er āinwōt ibwijlelep.
- [41] Im enaaj deļoñ ilo āne eo e aiboojoj, im elōñ aelōñ renaaj buñ. Bōtab rein renaaj joor jān pein: Idom, Moab, im eo mokta ian ro nejin Amon.
- [42] Im enaaj erļokwe pein ion elōñ aelōñ, im āne in Ijipt eban joor.
- [43] Im enaaj irooj ion mweiuk ko re nojak kōn gold im silver im ion aolep men ko re aorōk an Ijipt, im ro ri Libia im Etiopia renaaj ilo jetnakin neen.
- [44] Ak jet naan jān reaar im eañ renaaj kalōļņoñ e, im enaaj diwōjļok ilo illu eļap bwe en man im kanooj kejeepeļok elōñ.
- [45] Enaaj kajutak im nuknuk ko an kiñ ko an ikōtaan lojet ko im tol eo e aiboojoj im kwōjarjar. Bōtab enaaj itok ñan jemļoken, im ejjeļok enaaj jipañ e.

## JEPTA 12

- [12.1] Innām ilo iien eo Maikel, irooj eo eļap eo ej jutak kōn ro nejin armej ro doom, enaaj jutak, im enaaj wor juon iien eñtaan eo ejañin wor āinwōt jān ke ear juon aelōñ ñan iien in. Im ilo iien eo renaaj lomōoren armej ro doom, aolep ro rej lo bwe emōj je er ilo bok eo.
- [2] Im elōñ ian ro rej kiki ilo buñalñal an āne renaaj ruj, jet ñan mour indeeo im jet ñan jook im men in jōjōik indeeo.
- [3] Im ro ewor jelāļokjeņ ippaer renaaj rabōlbōl āinwōt meram in mejatoto, im ro rej tōl elōñ ñan wānōk āinwōt iju ko indeeo im indeeo.
- [4] Im kwe, Daniel, kwōn nooje naan kein im kiili bok eo mae iien āliktata; elōñ renaaj itoitak im enaaj ļapļok jelāļokjeņ.”
- [5] Innām ña, Daniel, iar reiļok, im lo, ear wor bar ruo raar jutak: juon ion tōrerein reba eo im eo juon i tōrerein eo juon an reba eo.
- [6] Im juon ear ba ñan ļeo ear kōņak nuknuk linen eo ear ilōñin dān in reba eo, “Ewi toñ an naaj men in kabwilōñlōñ kein jemļok?”
- [7] Innām iar roñ armej eo ear kōņak nuknuk linen eo ear ilōñin dān in reba eo ke ear kotak pein anmoon im pein anmiiñ ñan lañ, im ear kanejnej kōn Eo ej mour indeeo bwe enaaj ñan iien, im iien ko, im jimattan iien; im ñe emōj kōkkure kajoor an armej ro re kwōjarjar, enaaj jemļok men kein otemjej.

- [8] Im kōn ña, iar roñjake, ak iar jab mejeje. Innām iar ba, “O irooj, ta eo enaaj waļok jān men kein?”
- [9] Im ear ba, “Kwōn etal, Daniel, bwe emōj ŋooje im kiili naan kein mae iien āliktata.
- [10] Elōñ, enaaj ṁōj karreoik er, im kaṁṁanṁanļok er, im koweppan er; ak ro re nana renaaj kōṁṁan nana wōt, im ejjeļok ian ro re nana renaaj mejeje. Ak ro ewor jeļāļokjeṅ ippaer renaaj mejeje.
- [11] Im jān iien eo rej bōkļok katok eo an raan otemjej ñan iien rej kajutak men eo e nana im eļap an kōkkure enaaj 1,290 raan.
- [12] E ṁōṅōṅō eo ej kattar im ej tōpar 1,335 raan.
- [13] Im kōn kwe, kwōn iļok mae iien jeṁļoken. Kwōnaaj kakkije innām jerkak ñan kij eo aṁ ilo jeṁļoken raan ko.”